

分類補註李太白詩

五

蘇平知

PDG

分類補註李太白詩卷之九

贈

贈孟浩然

襄陽

吾愛孟夫子風流天下聞
紅顏棄軒冕白首
卧松雲醉月頻中聖迷花不事君
高山安可

仰徒此揖清芬

齊賢曰唐書孟浩然襄州人隱鹿門山四十年乃遊京師

張九齡王維雅稱道之維私召入內署俄而元宗至浩然匿舍下維以實對帝曰朕聞其人而未見也詔浩然出帝問其詩浩然再拜自誦其詩至不才明主棄帝曰卿不求見朕

未嘗棄卿今何
誣我因放還

贈從兄襄陽少府皓

結髮未識事所交盡豪雄却秦不受賞擊晉

寧爲功

齊賢曰漢書李廣結髮與匈奴戰史
秦白起破趙長平軍遂圍邯鄲魏使

辛垣衍入邯鄲欲尊秦爲帝時魯仲連游趙
見垣衍言帝秦之害垣衍乃不敢言秦聞之
爲却五十里平原君欲封仲連仲連不受擊
晉是用侯嬴進朱亥於魏公子無忌用鐵椎
擊殺晉鄙矯奪魏軍將以却秦救趙侯嬴自
刎復有客說公子不以爲功詳見三卷註

少節豈足言退耕春陵東歸來無產業生事

如轉蓬一朝烏裘敝百鎰黃金空彈劍徒激

昂出門悲路窮

齊賢曰春陵在今道州漢高祖不事家人生產作業戰國

策蘇秦說秦書上上不從黑貂之裘敝黃金百斤盡乃擔橐而歸國語註一鎰二十四兩史記馮驩彈鋏而歌晉書阮籍時率意獨駕不由徑路車跡所窮輒慟哭而反

吾兄

青雲士然諾聞諸公所以陳片言片言貴情
通棣華儻不接甘與秋草同

淮海對雪贈傅靄

一作淮南對雪贈孟浩然

朔雪落吳天從風渡溟渤梅樹成陽春江沙

浩明月興從剡溪起思繞梁園發寄君郢中

歌曲罷心斷絕

齊賢曰世說晉王徽之居山陰夜雪初霽月色清明西望

浩然忽憶戴逵逵時在剡便夜乘小船詣之經宿方至造門不見而反人問其故曰本乘興而來興盡而反何必見安道耶雪賦歲將暮時既昏寒風積愁雲繁梁王不悅遊于兔園俄而微霰零密雪下王乃歌北風於衛詩詠南山於周雅授簡於司馬大夫曰抽子秘思爲寡人賦之又曰君寧見階上之白雪豈鮮耀於陽春宋王對楚王問曰客有歌於郢中者其爲陽春白雪和者不過數人

贈徐安宜

白田見楚老歌詠徐安宜製錦不擇地操刀
良在茲清風動百里惠化聞京師浮人若雲
歸耕種滿郊岐川光淨麥壠日色明桑枝

齊賢

曰公羊曰京大也師衆也天子之居必以衆大之辭言之浮人流人也

訟息但

長嘯賓來或解頤青橙拂戶牖白水流園池

遊子滯安邑懷恩未忍辭翳君獨桃李歲晚

托深期

齊賢曰漢志安邑隸河東郡

贈任城盧主簿

海鳥知天風竄身魯門東臨觴不能飲矯翼
思凌空鍾鼓不爲樂煙霜誰與同歸飛未忍
去流淚謝鴛鴻齊賢曰魯語海鳥曰爰居止
於魯東門展禽今茲海有災
乎夫廣川鳥獸常知避其災也是歲海多天
風莊子云昔者海鳥止於魯郊魯侯御而觴
之于廟奏九韶以爲樂具大牢以爲膳鳥
乃眩視憂悲不敢食一嚙不敢飲一杯

早秋贈裴十七仲堪

遠海動風色吹愁落天涯南星變大火熱氣
餘丹霞光景不可迴六龍轉天車荆人泣美

玉魯叟悲匏瓜功業若夢裏撫琴發長嗟

齊賢

曰大火心星下和抱玉璞泣於荆山王贊曰南星即角亢氐房心尾之星史律書南至於亢南至於房南至於心南至於尾晉天文志自氐至尾爲大火此言夏而秋也

裴生

信英邁屈

其勿切

起多才華歷抵海岱豪結交

魯朱家復携兩少妾艷色驚荷葩雙歌入青

雲但惜白日斜

齊賢曰禹貢海岱及淮爲徐州漢書朱家魯人魯皆以儒

教而朱家用俠開所藏活豪士以百數閑以東莫不延頸願文士贊曰師古曰屈起特起也

窮溟出寶貝大澤饒龍蛇明主儻見收煙

霄路非賒時命若不會歸應鍊丹砂

贈范金卿二首

君子枉清盼不知東走迷離家未幾月絡緯
鳴中閨桃李君不言攀花願成蹊那能吐芳
信惠好相招攜

士贊曰目下爲清盼動目貌

我有結綠珍

久藏濁水泥時人棄此物乃與燕石齊撫拭
欲贈之申眉路無梯遼東慙白豕楚客羞山
雞

齊賢曰戰國策應侯謂秦王曰梁有懸黎
宋有結綠闕子曰宋之愚人得燕石於梧

臺之側藏之以爲大寶周客聞而觀之主人
齋七日端冕玄服以發實革圓十重巾十襲
客見俛而挽口盧胡而笑曰此特燕石也其
與瓦甕不殊主人怒曰商賈之言醫匠之心
藏之愈固守之彌堅士贇曰漢書司馬遷傳
迺欲仰首信眉論列是非朱浮與彭寵書曰
往時遼東有豕生子白頭異而獻之行至河
東群豕皆白慙而還尹文子曰楚人握山雉
欺路人曰鳳凰路人曰我聞鳳凰今始見矣
請買千金弗與請加倍乃與之方欲獻楚王
經宿死不遑惜其金惟恨不得獻王王
聞感之召厚賜之過買鳥之金十倍

徒有

獻芹心終流泣玉啼祗應自索漠留舌示山

妻

其二

范宰不買名絃歌對前楹爲邦默自化日覺
冰壺清百里雞犬靜千廬機杼鳴浮人少蕩
析愛客多逢迎遊子覩嘉政因之聽頌聲

贈瑕丘王少府

皎皎鸞鳳姿飄飄神仙氣梅生亦何事來作

南昌尉清風佐鳴琴寂寞道爲貴

齊賢曰唐兗州魯郡

治瑕丘縣漢梅福爲南昌尉棄官去至元
始中一朝棄妻子去九江至今傳以爲仙一

見過所聞操持難與群毫揮魯邑訟目送瀛
洲雲我隱屠釣下爾當玉石分無由接高論
空此仰清芬

東魯見狄博通

去年別我向何處有人傳道遊江東謂言掛
席度滄海却來應是無長風

見京兆韋參軍量移東陽二首

吳中

潮水還歸海流人却到吳相逢問愁苦淚盡

日南珠

齊賢曰東陽婺州吳地日南郡產珠

其二

聞說金華渡東連五百灘全勝若耶好莫道
此行難猿嘯千谿合松風五月寒他年一攜
手搖艇入新安

齊賢曰若耶溪新安見前卷註

贈丹陽橫山周處士惟長

周子橫山隱開門臨城隅連峰入戶牖勝槩
凌方壺時枉白紵詞放歌丹陽湖水色傲溟

渤川光秀菰蒲當其得意時心與天壤俱閑
雲隨卷舒安識身有無抱石恥獻玉沉泉笑

深珠羽化如可作相攜上清都

齊賢曰唐志宣州廣德縣

有橫山列子渤海之東五山三曰方壺丹陽湖隸當塗縣士贊曰列子范氏有子曰子華善養私名舉國服之未生子伯范氏之上客出行宿於田叟商丘開之舍相與言子華之名勢能使存者亡亡者存富者貧貧者富商丘開先窘於飢寒潛聽之因假糧荷輦之子華之門子華之門徒皆世俗顧見商丘開年老狎侮欺給亡所不爲因指河曲之隅曰彼中有寶珠泳可得也商丘開從而泳之旣出果得珠焉衆疑之俄而范氏之藏大火子華

曰若能入火取錦者從所得多少賞若商丘
開往無難色入火往還埃不侵身不焦范氏
之黨以爲有道乃共謝之商丘開曰吾亡道
雖吾之心亦不知所以曩子二客之宿吾舍
也聞一言范氏之勢吾誠之無二心故不遠
而來及來以子黨之言皆實也惟恐誠之之
不至行之之不及不知形體之所借利害之
所存也心一而已物無遷者如斯而已今乃
知子黨之誕我追昔日之不焦溺也恒然而
熱惕然震悸矣水火豈可復近哉自是之後
范氏門徒遇乞兒
馬醫不敢辱也

玉真公主別館苦雨贈衛尉張卿二

首

秋坐金張館繁陰晝不開空煙迷雨色蕭颯
望中來翳翳昏墊苦沉沉憂恨催清秋何以
慰白酒盈吾杯吟詠思管樂此人已成灰獨
酌聊自勉誰貴經綸才彈劒謝公子無魚良
可哀齊賢曰易雲雷屯君子以經綸史馮驩
聞孟嘗君好客躡屩而見之置舍十日
問傳舍長曰客何所爲答曰馮先生甚貧猶
有一劒彈其鋏而歌曰長鋏歸來乎食無魚
遷之幸舍
食有魚矣

其二

苦雨思白日浮雲何由卷稷卨和天人陰陽

乃驕蹇秋霖劇倒井昏霧橫絕巘欲往咫尺

塗遂成山川限淥淥音叢奔溜聞浩浩驚波轉

泥沙塞中途牛馬不可辨飢從漂母食閑綴

羽陵簡園家逢秋蔬藜藿不滿眼蠨蛸結思

幽蟋蟀傷福淺厨竈無青煙刀机生綠蘚齊賢

曰稷卨舜臣書三公燮理陰陽意以譏當時執政者漢書韓信從漂母食蠨蛸名長跼小如蜘蛛長脚者俗呼爲喜子蟋蟀郭璞註促織也亦名蜻蛚土贊曰唐書五行志天寶中